

1045 ut aiebat, certior factus, Gallos, qui Veronæ erant, in ejus agrum populationem & cædes fecisse, ædificia conbussisse, prædas abegisse, Paulo convento ad sua tuenda redire se domum velle ei denunciavit. atque ita, cum legati preces, & Julii atque reipublicæ maximorum erga se promeritorum commemoratio, & sui nota nominis, quam quidem notam atque calumniam accepto ab utroque stipendio, eorum causam tali tempore deserens, erat magnam indelebilemque subiturus, nihil apud ipsum valuissent, Mantuam rediit.

Erat Brixia in Joannis Francisci Gambaræ equitatu honesta conditione Petrus Longena, ejus oppidi civis, qui indignans se arma ferre contra eam ditionem, sub qua natus altusque annos triginta vixerat, coacto equitum idem sentientium numero, ex oppido profectus Montaniam ad Gritum venit, ut militiam reipublicæ faceret, orans obtestansque se recipi. de eo Gritti literis certiores Patres facti, Petrum Longenam recipiendum, & præfecturam LX. leviorum equitum ei dandam censuerunt. In comitio vero postridie ejus diei Marco Venerio, qui pridem vulneribus in expugnatione Monfalicensi acceptis usum prope manuum amiserat, scribæ munus in prætura Forojulienfi per quatuor magistratuum tempora dono datum, ut se alere familiamque suam posset. Filiis autem Ludovici Michaelis, quem Caravagianæ arcis custodem Galli captivum fecerant, atque in Galliam miserant, in triremibus reipublicæ balistarum loca decem, nobilibus adolescentibus dari solita, ad eorum matrem seque ipsos sustinendos item dono attributa. Inter hæc Senatus certior factus Hispanos equites, qui Veronæ erant, a Ferdinando Neapolim reverti jussos ab oppido tuendo discessisse, literas ad legatum Gritum dedit, ut cum iis quas habebat copiis Veronam contenderet: confidere se, si id celeriter faciat, posse ab eo urbem prope vacuum recipi, præsertim si edictum proposuerit, nullius civis in rempublicam injurias Senatum vindicaturum, civitatemque impunitum omnium onerum jubere esse, si ad rempublicam red-